

Kayëta ir 'Bëgalat in

Lilaya in

Akayëta and 'Bëgalat aŋo, Pol yëgwën babi bër gër bamara band Yesu Kërisët band gër ebar ed Galasi bën. 'Bësëyali bënëgwëš babi felërand mëne ado ga xwëta këno Yesu Kërisët, afo enëbi kacënd eni pexaxën. Xarak ax gi ex na mondako sëy'ali babi Pol. Ga re baxo mëne ekwëta ed Yesu Kërisët el gabat kë yëlënd or šenene ol. Eni nangaxën mëne osëy'ali orexëm ol đal dëŋ ex, Pol xwitan këbi end Abëraxam eŋ. Paḅ gë ekwëta ed xwëta baŋo Kaxanu el hixën baxo ar šenene, xarak amëd aŋo Acariya and Moyis aŋ ax gi bana. Mëŋ ex paḅ gë ekwëta ed Yesu Kërisët el, bënëŋ bënd bela beŋ đek këni šotënd or šenene ol gër ogës od Kaxanu. Er ex gër akayëta in:

End ofarëxanda or Pol do gë osëy'ali orexëm eŋ: 1.1–2.21.

End ekwëta ed Yesu Kërisët eŋ: 3.1–4.31.

End aniyān and ar yëmëk gë Angoc Amënëk eŋ: 5.1–6.10.

'Bepelatar beŋ: 6.11–18.

Ecëmar el

1 ¹ Wëno Pol këŋun yëgwënëlınd. Faba Kaxanu yata ke me gi parëxanda paḅ gë Yesu *Kërisët ir xanin këŋo gër bëšësëk: ax gi ex na paḅ gë ala, bëte ax gi ex na ga sana këne bela. ² Gë bëmaŷe bënd hi këmi ro bëŋ këmun yëgwënëlınd wën do gë đek bëmaŷe bënd gër bamara band *Yesu band gër ebar ed Galasi bën. ³ Kaxanu, Faba irebi, do gë Yesu Kërisët, axwën arebi an, yëlëlenun oyekax ol, gë obetak ol. ⁴ Axwën *Kërisët wāk šës ko në end bamena bandëbi ebo dacëtaxën gër aniyān atëmbak and gë okey oko aŋo, ang yāndi këŋo Kaxanu Faba irebi ak, ⁵ mëŋ ar hik gë enjaran end din ir din an! Amen!

End oxalay kalay or 'Bëgalat eŋ

⁶ Mbaŋ šaran ke wëno ang seḅ këno Kaxanu xarak mëŋ sana këŋun paḅ gë oyekax or *Kërisët ol do kën sëfënd aŷand ako Atëfëtan acëxe. ⁷ Enimin, Atëfëtan acëxe ax gi ex na. 'Barikan bela ex na bër këŋun felënd becëxen ga yāndi këbi eni nëngwët Atëfëtan and *Kërisët aŋ. ⁸ 'Barikan ado ex gido ar enga endam, ba meleka ir xaniwëk gër orën, y'elik eŋun nangënënd Atëfëtan and fitarëk gë and sëfëtan këmun wëno aŋ, katalenjo! ⁹ Ang felëra

këmun gër ÿanar ak këmun xënënannd wëno gërëgako: angëmëne ala enun pelënd Atëfëtan and fitarëk gë and nangën këmun biyi aŋ, katalenjo!

¹⁰Do gërëgako ene cëkwënd bela nde këme şaland ba exe cëkwënd Kaxanu nde? Ba këme şaland ene ŋanënd bela nde ca? Kido ene ŋan bela bame şaland, ame gi dona xadëp ir Kërisët.

End Pol eŋ

¹¹Ga re këme bëmaÿe, Atëfëtan and nangën këmun aŋo ax gi ex na endey end bela. ¹²Yesu *Kërisët mëŋ dëŋ nangën ke, ax gi ex na ga sëfëtan ke ala, bëte ax gi ex na ga sëÿali ke ala. ¹³Wën enimin, awël wël kën ang bame liyand ak, and bayi bame gër cale ind biyi Bëşëwif aŋ? Wëno babi rixërand wa gë oÿey osëm bërëwax end *Kërisët bën, bër Amara and Kaxanu bën. Mo calara bamëni şalarand mëni đaw bën dek. ¹⁴And bayi bame gër cale ind biyi Bëşëwif aŋ, wëno nëmëca babi bënd anjex andam bëŋ gër epëb ed bapela band sëÿali kënëbo bëxarëk bërebi baŋ. ¹⁵Barikan yatir fed këmi gë ar fit ke elod gër acël and nëma an, aŋac wac ke gë oyekax orexëm ol. ¹⁶Anangën nangën ke Asëniw arexëm an mëni tëfëtanaxënënd endexëm eŋ bër ax gi ex na Bëşëwif bën. Ata ga xucak eŋo, wëno ame ÿe ex na đe mo mëkara ala. ¹⁷Bëte ame ÿe ex na gër oparëxanda oŋanar ÿaŋ gër Yerusalem. Barikan ÿe këme şëw gër ebar ed Arabi đamana bakaxanëgu këme gër Damas. ¹⁸And xucak bëniy bëtas aŋ fo ÿexën këme ÿaŋ gër Yerusalem mi nangër gë Kefas. Ata xeyërax ke bakey epëxw gë banjo gër ndebën. ¹⁹Bari parëxanda işëxe ami watër bana angëmëne ax gi ex na Şak, ar acël amat gë Axwën *Yesu an. ²⁰End këmun felënd eŋo, Kaxanu anang nang ko mëne đal ex, ame nëgwëşënd na.

²¹Ga xucak eŋo, ÿe këme bëte gër owar or Siri do gë Silisi. ²²Xarak, ala axe nang bana amëd aŋo (gër bamara band bërëwax end *Kërisët gër ebar ed *Yude). ²³Awël fo bani wëlënd mëne ar babi rixërand an anëka nëngwëta ko. Gërëgako mëŋ këbi nangëndërand bela bën ekwëta ed *Kërisët ed baxo xemënannd exo đaw el. ²⁴Do në endam bano şëkwaxënënd Kaxanu.

End Pol do gë oparëxanda ocandaŋ eŋ

2¹Ata ga sëkëk bëniy epëxw gë bebënanx, baka këmi gë Barënas ÿaŋ gër Yerusalem. Awëla wëla bamo bëte Tit. ²Kaxanu şëđët baxe me baka gër Yerusalem. Asëfëtan sëfëtan këmëni bëlëngw bër Amara bën ang këme femërand Atëfëtan aŋ gër bër ax gi ex na Bëşëwif ak. Anacët nacët bamëni bëlëngw bër

gapak bën, këdi këme hërëra ahërëra fo, do me di andiyen and gë ofëcak këm. ³ Tit mëj, Agërek ar sëfër bami an, ala aņo nëyali bana eno kac. ⁴ Këme reyaxënënd dek ako, bela hi bax na bër bax rend okërecej exëni xarak enëgwës këni rind. Bën nëfënëfa bax gër enga endebi ga yandi babi eni bël or yaya or yël këbo Yesu Kërisët ol, do enëbo bëña. ⁵ Ata end bëjo eņ gë təkër ak ami ma ex na ex bayixën nëngwëtarëxe dal ir Atëfëtan in gër owëkw orewën aņ.

⁶ End bëlëngw bër gapak bër Amara bën eņ cëj, er hi bani damana eni gixën okërecej in, wëno axe bal ex na gayikwa gër ogës od Kaxanu bela bën dek gwër fo exëni! Bari bëlëngw bër gapak bëjo Yoweỹ ane nëyali bana me di. ⁷ Awat wat bani mëne Kaxanu xwëtënan këbo Atëfëtan aņ. Wëno mëni nangëndërand bëxacërëx bën, do Piyer bëxacëxac bën. ⁸ Kaxanu mëj ar yata këņo këņo Piyer exo gi parëxanda ir Bëšëwif an fo yata ke wëno bëte me gi ir bër ax gi ex na Bëšëwif. ⁹ Do and wat këni oyekax or yël këbo Kaxanu aņ, ata Šak, gë Kefas do gë Šaņ, bën bër ex bëlëngw bër gapak, bër fëb kënebi mbaņ bën, lëkër këmi bataxan band liw̃ baņ, gë wëno do gë Barënbabas, ex watixën mëne anëkëra exëna gër andiyen andebi: mi yend mi pemëra, wëno gë Barënbabas, gër benëng becëxe, do bën gër Bëšëwif. ¹⁰ Er xara banëbo fo mëni kwitand axwita bëxaỹëanax bën do eņo gë obal osëm bame rind.

End akucara and Pol gë Piyer aņ

¹¹ Barikan and yow ko Kefas gër Aņëcoš aņ, fabër këmi do nëp këmo gayik awen wën baxo. ¹² Damana eni yow Bëšëwif bër lawënëgu babi Šak bën, bër bax balëkënalind end oxac bën, Piyer, andamat bani yambërand gë bër ax gi ex na Bëšëwif bën. Barikan and hatëgu këni Bëšëwif bër lawënëgu babi Šak aņ Piyer, ga babi yëdand, nacëta këbi bër ax gi ex na Bëšëwif bën. ¹³ Ata Bëšëwif bëšëxe bër wa bax end *Yesu bën sëfëteli këno bëte Piyer gër amena andexëm xali lënan këno Barënbabas dëj gër egi ed ang bëyëņëanax bër kë labayand el. ¹⁴ And wat këme mëne ani dind na šenene aņ, ang kë sëyalind dal ir Atëfëtan ak, rexëra këmo poyoma Kefas mondako: «Wëj ašëwif hi këy, barikan këy liyand ang bër ax gi ex na Bëšëwif ak, ay masinaỹad na ang ašëwif ak. Do mondake cëj këy xor eyëbi nëyalind bër ax gi ex na Bëšëwif bën eni dıyand ang Bëšëwif ak?»

End apexa and benëng dek eņ

¹⁵ Biyi, bëxarëk bërebi bën Bëšëwif ebani, ane gi exe na bëwëndëran bër ax gi ex na Bëšëwif. ¹⁶ Anang nang këne mëne ala ar xwëta këņo Yesu *Kërisët an hik ar šenene an, bari ax gi ex na gayik asëf sëf ko er rek *acariya and Moyis in. Biyi bëte aŋa ŋa këne end *Kërisët eņ ene gixëne bër šenene paḅ gë ekwëta ed xwëta kënëņone el, ax gi ex na gayik asëf sëf këne er rek *acariya and Moyis in. Ala ax gind na ar šenene ga xemëna ko etëf ed acariya el. ¹⁷ Barikan angëmëne gër ocal od or šenene gër Kërisët, hi këne biyi bëte bëwëndëran, *Kërisët nde këbo lënanënd eņëņenax eņ? Adokiņ! ¹⁸ Angëmëne me bakan ecëņëxët me dind bend gër acariya bend seḅ këme beņ, wëno dëņ kë nëpayand. ¹⁹ Enimin, wëno dëņ ašës šës këme paḅ gë acariya aņ me dıyaxënënd ang ŋandi këņo Kaxanu ak. Afika fika këne gë Kërisët, ²⁰ ax gi ex na wëno kë liyand. *Kërisët kë liyand gër ola oram. Do anıyan andam and gërëgako gë eman aņ këme liyand gë ekwëta ed xwëta këmo Asëñiŋ ar Kaxanu el, mëņ ar han ke do yëlaya ko në endam an. ²¹ Mëņ ex, axe cena ex na end oyekax or rin ke Kaxanu eņ. Enimin kido ga sëf këne acariya aņ fo hixën këne bër šenene, awa mama fo šës ko Kërisët.

End acariya do gë ekwëta eņ

3 ¹ Wën Bëgalat bën ata and aņun pëņirand na dëņ ex de! Noņo wa yifa këņun? Ax gi ex na nde afaŋën faŋën këmun dek er ŋacayak ecës ed Yesu *Kërisët gër kërëwa in? ² Emat fo ŋandi ke mun mëka ene nangën: Ba ga sëf kën acariya aņ nde šotaxën këno Angoc Amënëk aņ? Ba ga baxët kën do xwëta kën Atëfëtan aņ nde? ³ Mëņ ex, wën ata and aņun pëņirand na dëņ ex. Angëmëne enimin gë panga ind Angoc Amënëk in ŋana kën, mondake cëņ nëņgwët kën do kën liyand gë ojaŋ odewën ok? ⁴ Do dek er hi kënuņ gër anıyan andewën in, ahi fo nde hi këņun? Ax mënd ex na eņun gi ahi fo. ⁵ Ar yël këņun Angoc Amënëk an, ar kë rind becarax mërëxand irewën an, ba ga sëf kën acariya aņ nde ko rixënënd, ba ga xwëta kën Atëfëtan aņ nde?

⁶ Ax gi ex na nde *Abëraxam axwëta xwëta baņo Kaxanu mëņ hixën baxo ar šenene gër ogës odexëm^a? ⁷ Mëņ ex, nangin mëne bër xwëta këņo *Yesu bën fo hik oḅaš or *Abëraxam ol. ⁸ Oñëgw Omënëk ok fëna bax mëne axwët këbi xwët bër šenene ga xwëta xwëta këno Kërisët. Kaxanu fel baņo *Abëraxam endey enëņgax

enjo: «Benëng beŋ ðek kë beta në endey.»⁹ Mondako këni šot obetak ol ðek bër xwëta këŋo Kaxanu ang *Abëraxam bën.¹⁰ Do ðek bër kë yëland šenene hi këni gër ogës od Kaxanu bën në end ga këni rind er rek *acariya and Moyis bën, anëka xata këbi gayik anëp këbi nëp Kaxanu. Enimin aŷëgw yëgw këni: «Katalenjo ar ax tëf ex na ðek er yëgw këni gër akayëta and *acariya and Moyis an^b.»¹¹ Ala ax gind na šenene gër ogës od Kaxanu gayik acariya sëf ko do enjo ðal ex. Ga yëgw këni: «Ala ar ke liyand šenene an axwëta xwëta këŋo Kaxanu^c.»¹² Xarak, etëf ed acariya el mbaŋ fitarëk gë ekwëta ed Kaxanu el. Gër Oñëgw Omënëk ga rek: «Ar kë ŵa exo dind ðek er rek acariya an kë liya gë beŋo^d.»¹³ *Kërisët racët këbo gër kata ind ebax ebo wëcan iŋ gayik abane xor exe na ene tëfe er rek acariya in. Enimin ga yëgw këni gër Oñëgw Omënëk: «Ala ar xaŵ këno yo në osëx ar xata këŋo exo^e.»¹⁴ Ga šës ko Yesu *Kërisët këni šotaxën bër ax gi ex na Bëšëwif bën oyekax or beya baŋo Kaxanu *Abëraxam ol. Biyi ðek mondako këñëŋo šotaxëne Angoc Amënëk and beya këbo Kaxanu aŋ gayik axwëta xwëta këñëŋone Kërisët.

End acariya do gë ebey'a en

¹⁵ Bëmaŷe baçëtin amatinali aŋo: Angëmëne ala exo ñëgw aye end acota and ko sebëta en, er re ko in gabatak ax yepënënd na, gabatak ax bašënd na yëy.¹⁶ Xarak Kaxanu mondako beya baŋo *Abëraxam. Bend beya baŋo beŋo, xwën bani *Abëraxam do gë ar andëwëra andexëm an. Oñëgw Omënëk ok ax de ex na gë bërändëwëra andexëm bën këdi këni yëla bela bën end bëranjëm ko yeyanënd. Barikan ala abat fo këŋo rend mëne ngëŋ Kërisët.¹⁷ Mëŋ këme rexënënd: Kaxanu, er beya baŋo *Abëraxam in abayi bayik. Acariya and hatëguk ga xucak bëniy okeme onax gë ofëxw osas aŋ, ax kor ex na ex yepën. Kido axor xor bax, end beya baŋo en ax gi dona.¹⁸ Angëmëne er xëñëna baxo Kaxanu ebo yël in paß gë acariya aŋ këne šotënde, abo yël dona në end ga beya ko. Xarak Kaxanu ga beya baŋo *Abëraxam yëlxën baŋo oyekax orexëm ol.

¹⁹ Do ineŵa hixënëk acariya aŋ? Në end bamena band bela fedalixënëgu baxo Kaxanu acariya aŋ, xali exo ŋataxënëgu arandëwëra and *Abëraxam ar beya baŋo an. Acariya aŋo

^b3.10 Andocane 27.26

^c3.11 Abakuk 2.4

^d3.12 Andolewit 18.5

^e3.13 Andocane 21.23

omeleka laŵëneliw babi Kaxanu wëlaw këni gër Moyis. Ata hi ko mondako Moyis, ahatelindër ar Kaxanu gë bulunda ir Isërayel an. ²⁰Barikan Kaxanu, and bey'a baŋo *Abëraxam gë arandëwëra andexëm ak, ahatelindër ax gi bana, Kaxanu gabat ebaxo.

End ofëcak or acariya eŋ

²¹ Acariya aŋ aŷepën nde kë ŷepënënd bend bey'a këbo Kaxanu beŋ? Adokiŋ! Kido acariya ebaxëna and kë yëlënd aniyän, or ŷenene ol paŋ gë acariya aŋo hi dox mocot. ²²Barikan Oñëgw Omënëk ok beŷ bën ðek sërak gë eñëŋënaŷ eŋ, eni cotaxën ðek bela bën er bey'a ko Kaxanu ayël këbi yël in gayik axwëta xwëtak këno *Yesu Kërisët. ²³Damana ex ŋataxënëgu ekwëta ed *Kërisët el, acariya aŋ babo xaŋacënd ene cënixëne ekwëta ed ebax ebo nangën Kaxanu el. ²⁴Ata acariya aŋ mondako hi bax xaŋac arebi xali enëŋo kwëtaye *Kërisët ene gixëne bër ŷenene. ²⁵Do ga hatëgu ko ako ar xwëta këñëŋone an, ane bayi exe na gër oxadac or acariya.

²⁶Gërëgako wën ðek anëka hi këñ obaŷ or Kaxanu ga xwëta këno ako Yesu Kërisët. ²⁷Enimin, wën ðek bër buyi kënun xobuyi or *Kërisët bën, anëka bar këñ gë mëŋ. ²⁸Mëŋ ex; Aŷëwif ax gi ex na, ar ax gi ex na Aŷëwif ax gi ex na, xaŋëp ax gi ex na, asoŷan ax gi ex na, asoxari ax gi ex na. ²⁹Gayikwa abar bar këne gë Yesu Kërisët, bërändëwëra and *Abëraxam hi këñ, wën ex bër kë bëteli er bey'a baŋo Kaxanu ayël këŋo yël in.

4 ¹Eŋo këme rend: ang kë nëka yo ga bayi ko itox ar kë bëteli napul ir sëm an ani pitarënd na gë xaŋëp in, xarak mëŋ dëŋ ex axwën ar napul ðek an. ²Mëŋ abaxët këbi baxëtënd bër këŋo xaŋacënd do hi këni bëwëxëta bër napul irexëm bën xali ex ŋat and fënëta ko sëm exo bëtelira aŋ. ³Ata biyi bëte mondako fo ex endeŋi eŋ: and bayi bane ang obaŷ fo aŋ, baŷepela band ex yo babo wëñand gër ngwën ro. ⁴Barikan and hatan këŋo Kaxanu aŋ, laŵëneliw këŋo Aŷëñiŷ rëw këŋo asoxari, do sëf ko acariya aŋ, ⁵ebo dacëtaxën biyi bër hi këne okadëp od acariya, ene gixëne obaŷ or Kaxanu. ⁶Do ga hi këñ ako obaŷ orexëm, laŵënelixënëgu këbo gër oŷëkw orebi Angoc and Aŷëñiŷ aŋ. Në end Angoc aŋo këñëŋo wacaxënde Kaxanu: «*Aba!» Faba! ⁷Mondako hi këñ obaŷ or Kaxanu, an bayi ex na okadëp. Do angëmëne obaŷ or Kaxanu hi këñ ayël këñun yël oyekax or fënan këbi obaŷ orexëm ol.

End obal od Pol enj

⁸ Akarëk aŋ, ano nang bana Kaxanu, do mëj hixën ban okadëp od bebër ban xëland, xarak abî ñap ex na. ⁹ Barikan gërëgako ga nang këno ako Kaxanu, me dedo mëj ga nang këjun ako, mondake cëj kën bakand gër oxadëp or bapela band gë ofëcak këm baŋo? ¹⁰ Ax gi ex na nde wën kë yëland mëne: bakey exëna, opacaŋ exëna, bapëxëd exëna, bëniy exëna, bënd xucak ex këbën? ¹¹ Ata wëno mbaŋ këme yëdand de endewën enj, bamat ba asorora fo bame sororand në endewën na.

¹² Bëmaÿe bëndam, axara xara këmun, giyin ang wëno ak gayikako wëno bëte ang wën ak hi këme. Yoweÿ ane menan ex na. ¹³ Aye nang kën mëne ame bëngw bana and bame femërand añanar Atëfëtan and Kaxanu aŋ gër ndewën, do gematak dëj ane menan ex na. ¹⁴ Ang šëxwëra bame ak, ane cus bana bëte ane kwëÿëta bana, wëlaya këne ang meleka ir Kaxanu fo, ang Yesu *Kërisët mëj dëj. ¹⁵ Do feye ex onënga orewën ol? Gayikwa osede orewën olo këme reyarand, kido awënd wënd bax, axor xor don en dëxët bangës bandewën baŋ do ene yël. ¹⁶ Awa ba arangoÿëra andewën nde hi këme ga këmun felënd ako dal in?

¹⁷ Bër këjun wäsinënd mëne abal këbi balënd endewën bëjo anun ŋan ex na. Er ÿandi këbi enëbo capëreli wëno gë wën, do wën enjun balënd endebën fo. ¹⁸ Ebalëkënali ed beÿ el er šenene ex nand ex yo, barikan ax gi ex and hi këne në erebat aŋ fo. Do ang baŋun balënd endam ak bayiyin ga këjun balënd mondako fo. ¹⁹ Wën obaš oram, angëmëne me kwitand ang soro këme në endewën na, gašëxe ke ŷambënënd ang asoxari ar orëw fo. Do gë aÿambën ijo këme bayi xali nand kën wëndër dek gë *Kërisët gër ola orewën na. ²⁰ Enimin oñandi odam ok ex me gido gërëgako dëj mërëxand irewën, mëj nangaxën dome ba mondake felëra domun. Ata dek wëlandëra ke de endewën enj.

End Sara do gë Agar enj

²¹ Wën bër ÿandi këjun en tëf *acariya and Moyis bën, peline ba afëni dëj nde fëni këjun er ÿëgw ko Moyis in? ²² Ga ÿëgw ko wa mëne: «*Abëraxam bëtox bëki šot babi, iñanar iŋ gë asoxari ar hi bax xadëp an, do ikinëm iŋ gë asoxari ar ŷaÿa an. ²³ Itox ind asoxari axadëp iŋ rëw këno ga ÿandi babi eno cot. Barikan ind asoxari ar ŷaÿa iŋ rëw këno ga beÿa babi Kaxanu. ²⁴ Gër endey eno amatinali exëna gayikwa bësoxari bëxi bëjo ex oser oxî or gë Kaxanu oŋ. Eter eñanar el ex ed gër etënd ed Sinayi el, elo ex ed gë oxadëp el: mëj ex *Agar.» ²⁵ Ata *Agar ex etënd ed

Sinayi el gër ebar ed Arabi. Kaxanu fën yëlëgu këno acariya aŋ Moyis. *Agar angol and Yerusalem and gërëgako aŋ, mëŋ gë obaš orexëm ol okadëp exëni. ²⁶Barikan Yerusalem ir y'aŋ gër orën in ex asoxari ar y'ay'a an, mëŋ ex nëma irebi. ²⁷Mëŋ yëgwaxën këni:

«Nëngandëralexi wëj asoxari aboroxok an,
Nëngandëralexi wëj ar ax dëwënd na an!
Depërayind onënga ol,
wëj ar elod ax tÿy'i ex na ay'ambën ir orëw an.
Gayikwa wëj ar fela këni gër eñër an,
Obaš orey' ol kē yëmb nëmëc
Gë or asoxari ar bayik gër eñër an^f.»

²⁸Bëmaÿe ga hi kën obaš or Kaxanu mëŋ dëŋ bey'a këjun ang bey'a baŋo *Isak ak. ²⁹Do ang hi bax akarëk ak, itox ind rëw këno gë oñandi od bela fo iŋ baŋo rixërand ind rëw këno gë oñandi od Angoc and Kaxanu iŋ, mondako fo ex bëte gërëgako. ³⁰Xarak ine rek Oñëgw Omënëk ok: «Ŋw'ayëlëbi asoxari ar ex xadëp an do gë asëñiw, gayikwa asëñiw din ani bëteli na andamat gë asëñiw ar asoxari ar y'ay'a an⁹.» ³¹Mëŋ ex bëmaÿe, pënileŋun aye eŋo: Obaš or asoxari ar y'ay'a ol hi këne, ane gi exe na or asoxari axadëp ol.

End oyekax or oxëreceŋ eŋ

5 ¹Ene canaxëne gër oxadëp or acariya racëtaxën këbo Kërisët. Awa dëkayayin šenene eŋo do këren baka na gašëxe gër oxadac or gë oxadëp.

²Wëno Pol ga re këme angëmëne mondako kën yëland bër šenene hi kën gayik axac xac kënun, er ri ko *Kërisët in yowey aŋun yël na. ³Ga këme reyand wa bëte: ar rek axac këno xac yo, tëfindëlexo dë dëk er kë rend acariya in, gematak kërexo dífënd na. ⁴Anëka šapër kën gë *Kërisët wën bër yandi këjun en gi šenene gër ogës od Kaxanu gayik asëf sëf kën acariya bën. Nangiŋ mëne an gi ex na šëf gër bër yël këbi Kaxanu oyekax orexëm. ⁵Biyi cëŋ paß gë Angoc Amënëk aŋ këne šëninde mëne gë ekwëta el këne šote or šenene or këne yarënde ol. ⁶Gër bër barëk gër Yesu *Kërisët er xëbënëk in ex ekwëta ed kē wāsinayand gë ebalër el, ax gi ex na oxac ol, ax gi ex na bëte oxacërëx ol.

⁷Šenene yana ban oxëreceŋ orewën ol, noÿo cëŋ yifa këjun xali seß kën d'al in? ⁸Endey' end yifaxën kënun eŋ, ax kaniw ex na dë

^f4.27 Esayi 54.1

94.30 Añanar 21.10

gër Kaxanu, mënj ar sana kënjun an. ⁹ Ax gi ex na nde lewir ir təkër fo kë fufënënd dek pix ind negali këni in? ¹⁰ Wëno axwëta xwëta këmun mëne ang këme yëland ak ata mondako dënj kën yëland wën bëte ga bar këne gë Axwën an. Ar kënjun yëbun an, hi ko yo ar hi ko, Kaxanu anëp këjo nëp.

¹¹ Wëno cëj bëmaÿe, kido abayi bayi bame ga këme femërand end oxac eñ, arixëra nde done rixërand? Kërëwa in, er këni fokërend bela in, ax bo dona. ¹² Bër kënjun yëbunënd gë oxac bëjo kemënalexëni eni kacërend oyëxwëÿët.

End eđiya ed Angoc Amënëk eñ

¹³ Bëmaÿe, wën cëj Kaxanu racët kënjun gër oxadëp, do an bayi ex na okadëp. Balëringëleñjun do dëcarindën andewën rewën, kërex gi na akay'a and en dind er ex oñandi od eman in. ¹⁴ Dek *acariya and Moyis añ në apela amat barëk, and kë rend: «Balindëlexi end ašandax eñ, ang ki balënd end gaf irey' ak^h.» ¹⁵ Barikan angëmëne wën en ñatërend, do en yambarënd andewën rewën añ, titinayin de këdi kën lawër.

¹⁶ Awa ga re këme: điyayindën ang këjo ÿandind Angoc Amënëk ak ata kën seđ etëf ed oñandi od eman el. ¹⁷ Gayikwa oñandi od eman ok axucar xucarëk gë od Angoc Amënëk ok. Oñandi od Angoc Amënëk ok axucar xucarëk gë od eman ok ado mbañ xucarëk xali wën an korënd na en di er kënjun ÿandi in. ¹⁸ Barikan angëmëne Angoc Amënëk añ kënjun xađacënd, an bayi na ga kënjun xađacënd acariya añ. ¹⁹ Xarak anang nang këne mëne oñandi od eman ok kë lënanënd: gër orekar, gër obuyaraxik, gër eñac, ²⁰ gër ekëla ed olaš, gër ošaki, gër ecusër, gër ekeÿër ed gë bela, gër oyakëraxi, gër oxey, gër ebañër ed bela, gër ecapëreli ed bela, gër osëmbak, ²¹ gër ohateÿi, gër ošëb, gër ekureliran, do gër bëndako rako. Enimin, në ekwitan emun ang fel këmun ak: bër kë liyand mondako bën din ani đil na gër owun or Kaxanu.

²² Barikan bër këbi xađacënd Angoc Amënëk bën kë liyand: gë añana, gë onënga, gë obetak, gë ebuñan, gë oyekax, gë obëngw or onden, gë ekwëta, ²³ gë anjus do acariya ax cëban ex na bejo. ²⁴ Awa bër bar këni gë Yesu *Kërisët bën, anëka fikali këni beman bende bën bej do gë oñandi oñëñëanax ode bën ok gër kërëwa ir Kërisët. ²⁵ Angëmëne gë Angoc Amënëk añ këne liyande, điyandëne ang këbo xađacënd ak. ²⁶ Kërene dafënarande na, kërenëbe ñanaxënënde na bëcandaw bëj, kërebo y'akëraxind na.

6¹ Bëmaÿe, angëmëne eno pënga ala gër amena and ko rind, amena and ex yo, wën bër këjun xadacënd Angoc Amënëk bën wërëšëtino endëmane. Wën bëte titinayin këdi këjun narjëta do en mendëra ang mëj ak.² Dëcarindën andewën rewën aŋ gër ocëmu gayik mondako kën ÿana en tëfënd acariya and *Kërisët aŋ.³ Angëmëne ala exo yëland mëne mëj ala asëm hi ko, xarak ÿoweÿ axo gi ex na, gaf irexëm fo ko yifand.⁴ Ala kala dafënayindëlexo gabat në end er ko xorënd exo di eŋ, xarak ax gi ex na exo matinalind gë er ašëxen in.⁵ Gayikwa ala kala gë er ko rind in ko yaka gër Kaxanu.

⁶ Ar këno sëÿalind eyeyan ed Kaxanu an, cetindëleŋo dek napul irexëm in asëÿali arexëm an.⁷ Këren yifaya na: Kaxanu ala aŋo mëkëñaxënd na. Er ko nedënd ala in, ejo fo ko xanand bëte.⁸ Ar kë liyand ang këjo ÿandind eman an er kë rëwënd oñandi od eman in ko xana, mëne ngëj ecës el. Barikan ar kë liyand ang këjo xadacënd Angoc Amënëk an, er kë rëwënd Angoc Amënëk in ko xana, mëne ngëj, aniyand din ir din aŋ.⁹ Kërebo barëbarand na edi ed benjekax el gayik axana këne xanaye oyekax or këne rinde ol and kë hat amëd aŋ angëmëne abo cena ex na.¹⁰ Awa mondako ex de, ga šot këne ako amëd aŋ, dindëne benjekax ebi yraxën bela bën dek, ado dek dek in bër ekun ed ekwëta bën.

¹¹ Watin oñëgw oko ro ang rafëk ak, ata kën nang mëne wëno dëj ÿëgwëlik.¹² Dek bër këbi ÿandind enëbi cëkwënd në end er ex gër eman bën këjun nëÿalind enun kac këdi kënun ÿana enun dixërand në end ga kën femërand ecës ed *Kërisët gër kërëwa el.¹³ Gayikwa bën bër kënebi xacënd bën dëj ani tëfënd er rek acariya in. Barikan emat fo ÿandi këbi: wën enun kac eni dafënoxënënd mëne në end endebën xacaxën kënun.¹⁴ Wëno emat fo ex end këme rafëna eŋ: end kërëwa ir Yesu *Kërisët, Axwën arebi eŋ. Gër kërëwa ijo šës këme do ecës elo šapëreli këbo wëno gë bend gër ngwën ro bej. Mëj ex wëno ame bo ex na ga këme sëfënd bend gër ngwën ro bej.¹⁵ Gayikwa gër Kaxanu, xac këni nde, ani kac ex na nde, mëj ax gi ex na eŋo këjo balënd. Er këjo balënd in ex ola oxašax or šot këÿ ol.¹⁶ Dek bër kë sëfënd osëÿali or apela aŋo ro bën, Kaxanu ayël këbi yël obetak ol do gë axaÿënan in bër Isërayel ir Kaxanu bën!

¹⁷ Gërëgako ala kërexe bašën na toro iŋ gayik gër eman endam ro ex bambënut band në end *Yesu baŋ.¹⁸ Bëmaÿe, Axwën Yesu *Kërisët yëlëleŋun oyekax orexëm ol gër onden ondwën! Amen!